

# GEDRAGSKODE VIR OUIERS EN ONDERSTEUNERS

## ALGEMENE BELEID

Die deelname aan skoolsport is primêr opvoedkundig van aard.

## DOEL VAN SKOOLSPORT

Om deelname aan te moedig en om leerders toe te rus met sportmanskap, selfdissipline, selfbeheersing en deursettingsvermoë.

## VEREENSELWIG MET FICHIES

- Ouers en toeskouers moet hulself as verteenwoordigers van die skool sien wanneer hul wedstryde bywoon of hul kinders ondersteun.
- U word aangemoedig om die span waarin u kind speel te ondersteun asook soveel as moontlik van die ander skoolspanne.

## GEDRAG TYDENS WEDSTRYDE

- Positiewe ondersteuning word op prys gestel.
- Ouers en ondersteuners word versoek om hulle te weerhou van negatiewe opmerkings of ongehoorde taalgebruik teenoor skeidsregters, ander beamptes, spelers of ondersteuners van die opposisie.
- Ouers en ondersteuners word versoek om die nodige afstand vanaf die kantlyne te handhaaf en nie binne die speelveld of afgemerkte areas te gaan nie. Tydens krieketwedstryde moet toeskouers nie agter die bouler se rug sit of beweeg nie. Tydens hokkiewedstryde moet toeskouers nie op die doelhok sit of agter die doellyn beweeg nie.
- Ouers en ondersteuners word versoek om nie op en af langs die veld te stap terwyl 'n wedstryd aan die gang is nie.
- Ouers en toeskouers word versoek om nie binne die tegniese area te kom waar dit wel van toepassing is.
- Ouers en ondersteuners word versoek om hulle te hou by die reëls wat vir elke wedstryd of toernooi van toepassing is.

- Ouers en ondersteuners moet die nodige verdraagsaamheid en respek betoon teenoor medetoeskouers en opposisie.
- Ouers en ondersteuners moet so optree dat hulle altyd die skool se beeld na buite sal uitdra en niks doen wat dit kan skade aandoen nie.

## BESERINGS

Ouers en toeskouers word versoek om nie op die veld te gaan wanneer 'n speler 'n besering opdoen nie. Indien die afrigter / bestuurder of noodhulppersoneel dit nodig ag, sal die betrokke ouers nader geroep word.

## SPANKEUSE

U word versoek om nie in te meng met die afrigter se spankeuse nie. Wenke wat met die regte gesindheid bedoel word, kan wel aan afrigters op die regte tydstip oorgedra word.

## KOMMUNIKASIEKANALE

Ouers en ondersteuners kan enige navrae of probleme opneem met die sporthoof / skoolhoof. Probleme kan ook met die betrokke persoon bespreek word, maar nie langs die veld nie. Ernstige klagtes kan ook met die beheerliggaam (sport) opgeneem word.

Ons versoek dat by die gedragskode gehou moet word sodat spelers en toeskouers hul sport kan geniet.

# GEDRAGSKODE VIR LEERDERS

## INLEIDING

Die doel van hierdie dokument is om vir elkeen sy regte en verantwoordelikheid met betrekking tot sportdeelname in die skool uit te lig.

Elkeen word verbind tot:

- Integriteit
- Die ontwikkeling van die sport waarvan jy deel is
- Sportmanskap en positiewe gesindheid
- Verantwoordelikheid teenoor jou spanlede, ouers, afrigters en borge.

## REGTE EN VERANTWOORDELIKHEDE

1. Elkeen het die reg om sport te geniet in 'n veilige en behoorlike gestruktureerde omgewing

- Daar moet te alle tye by die voorgeskrewe ouderdomsgroepe gehou word om spelers teen beserings en invloed van ouer leerders te beskerm.
- Die hoogste vorm van sportmanskap moet te alle tye gehandhaaf word.
- Die korrekte kleredrag en toerusting moet aangemoedig word.
- Spelers moet hul eie besittings en die skool se toerusting met die nodige respek behandel en in stand hou (oppas).
- Spelers moet verantwoordelikheid vir hul optrede aanvaar en hulle hou by die reëls vir elke sportsoort.

2. Elkeen het die reg om beleefd en met respek behandel te word en die verantwoordelikheid om dit waardig te wees.

- Spelers moet hulle verbind tot hoflikheid en verantwoordelikheid wat die waardes en standarde van Fichies sal uitdra.
- Onberispelike gedrag en taalgebruik word te alle tye verwag.

- Geen mede-speler, beampte, opposisie of toeskouer mag beledig word nie.
- Elkeen moet verdraagsaamheid en respek betoon teenoor lede van die teenoorgestelde geslag of ander taal- en kultuurgroepe.
- Elkeen moet sorg dat hy / sy die nodige kennis opdoen van die reëls en die vertolking daarvan.
- Lewenswaardes soos probleemoplossing, durf, waagmoed, respek, trots en nederigheid moet aangekweek word.

### 3. Reëls en dissipline met betrekking tot wedstryde waaraan Fichies deelneem of dit aanbied

- Spelers is onderhewig aan die neergelegde reëls van die skool van die oomblik wat hulle hul huise verlaat totdat hulle daarheen terugkeer.
- Dit word van spelers verwag om altyd 'n goeie voorbeeld te stel.
- Spelers moet onthou dat hulle deurgaans beelddraers van Fichies is.
- Spelers moet altyd die korrekte neergelegde sportdrag tydens byeenkomste aanhê waar dit vereis word.
- Spelers sal verantwoordelik gehou word vir herstelkoste van skade aan items wat deur kwaadwillige beskadiging of nalatigheid van spelers tot gevolg het.
- Spelers moet altyd die spel na die beste van hul vermoë met die nodige sportmanskap beoefen.
- Spelers moet altyd die beslissing van skeidsregters aanvaar met die nodige respek.
- Spelers moet altyd goeie beelddraers van Fichies wees deur hul optrede en voorkoms.